


BISONO NA ZULU YA KIBAKA

 Mutindu yayi kele nkokila ya Kilumbu ya tatu, mu silaka mazono na nkokila na . . . mu zolaka tuba, kana Mfumu ke pesa muswa, na nkokila yayi, na zulu ya dilongi *Bisono Na Zulu Ya Kibaka*. Ya kele kieleka, oh, beto lenda tula basabala na zulu ya dilongi yayi, mpe na yina kukondwa kusimba ata fioti ve nsongi ya yawu. Kasi mu ke meka na kutubila yawu fioti na nkokila yayi, na lusalusu ya Mpeve-Santu. Mpe ntangu yayi mu zola kutanga na Daniel, kapu 5 mpe nzila ya 25. Mpe Yawu ke tuba mutindu yayi:

Mpe yayi kele bisono yina ba sonikaka, MENE, MENE, TEKEL, UPHARSIN.

Mpe ntangu yayi bika ti Mfumu kubwela balusakumunu ya Yandi na Kutanga yayi.

² Mpe mu ke kukiyufula kana mpangi ya beto ya mbote, mukengi ya kisika yayi awa, lendaka kaka kubalula minda yayi kuna. Mu kele. . . Ya ke sema tii kuna na nsi na lweka yayi. Matondo na beno, na mutindu ya mbote. Mu lenda ve kumona bantu. Na yina ntangu mu ke tuba na muntu nionso, mu ke zola tala bawu na kizizi ntangu mu ke tuba. Ya ke monana kaka ti ya kele kukutana ya munu mosi na bantu.

³ Ntangu yayi beto ke na kivuvu na Mfumu ya beto, na nkokila yayi, na yina beto ke meka kaka na kubaka ntangu ya munu mpe kutubila dilongi yayi. Mu zaba ti ya kele dilongi ya nene. Mpe ya kele dilongi ya kumwangisa nsangu na mutindu . . . , mpe muntu ve samu na kubeluka ya Kinzambi. Kasi ya kele samu na kubeluka ya nene ya Kinzambi. Nzutu ya kulutula bambevo yina mu zaba na nkokila yayi, kele Nzutu ya kimpeve ya Mfumu ya beto Yesu, na zulu ya ntoto yayi; mpasi mingi, mpe kukabwana, tii kuna ya ke na nsatu ya kubeluka ya Kinzambi.

⁴ Ntangu yayi, dilongi ya beto na nkokila yayi ke banda na Babylone. Mpe Babylone vwandaka ntete, yina kele ntete, na Ngonda yina ke ngenga. Mpe ba bokilaka yawu ntete, “mwelo ya Nzambi,” *Babel*. Babel, mpe na manima ba bokilaka yandi *Babylone*, yina zola kutuba “muvusu.” Mpe Babylone ke monana ntete na kati ya Biblia, na Genèse; mpe ya ke monana na kati-kati ya Biblia; mpe ya ke monana na nsuka ya Biblia, na Buku ya nsuka, Apocalypse. Mpe na yina nionso yina kele na nzila ya Biblia, ya fwana vwanda na luzingu diaka bubu yayi.

⁵ Mpe, mpe, nionso yina kele na zulu ya ntoto bubu yayi, na mutindu ya bima ya kimpeve, mutindu Mpeve ya Nzambi mpe mpeve ya yimbi, mpe binzambi-nzambi nionso mpe nionso yina kele na beto bubu yayi na yinza, bawu bandaka na Genèse. *Genèse* zola tuba “mbandukulu.” Mpe bima nyonso yina, kasi

na yisi ya nkumbu yankaka mpe na yisi ya mutindu yankaka, kasi mpeve mosi yina bandaka na Genèse, yina ke basisa yawu. Mpe ya kele kaka mutindu yinti ke kula, ke na kubelamaka na yintu, kisika ya ke vwanda ntangu ya zulu mingi na nsuka, samu balufundusu ya nene ya Nzambi, kisika Yandi ke vwandisa bima nionso. Mpe nionso yina vwandaka na mbandukulu ke vwanda na nsuka. Kaka bima yina vwandaka ve na mbandukulu kele na nsuka ve.

⁶ Ya kele samu na yina Muklisto yina me butuka mbala zole kele ve na nsuka, samu ti yandi kele na Luzingu ya Kukonda nsuka. Mpe Luzingu ya Kukonda nsuka kele kitini ya Luzingu ya Nzambi Yandi mosi, samu ti Nzambi kele ya Kukonda nsuka. Mpe mpova yina mosi, mpova ya Grec *Zoe* yina ke tuba “Luzingu ya Nzambi,” ntangu Yesu ke zonza mpe ke tuba, “Mu ke pesa bawu Luzingu ya Kukonda nsuka,” mpova mosi yina ba me sadila dyaka. Na yina, muntu yina me butuka mbala zole, mpeve ya yandi me soba, mpe yandi me kuma kitini ya Nzambi, na mutindu ti yandi kele mwana ya Nzambi. Mpe yandi kele kaka Kukonda nsuka mutindu Nzambi kele ya Kukonda nsuka, samu ti yandi kele kitini ya Nzambi, na nzila ya Lubutuku ya yandi, Lubutuku ya kimpeve.

⁷ Ntangu yayi, Babylone ba salaka yawu na muntu mosi na nkumbu ya Nimrod, yina vwandaka mwana ya Cham, muntu ya yimbi mingi.

⁸ Mpe Babylone vwandaka yintu-mbanza ya yinza. Ntangu ba tungaka mbanza yayi ya nene kuna, mwa bambanza ya fioti nionso, nionso yinza vwandaka na nziunga ya yawu, vwandaka futa bitadi, bampaku, mpe nionso yina, na mbanza yayi ya nene, Babylone.

⁹ Mpe kuna na kati, kana beno tanga na babuku ya ntama, mutindu *Babylone Zole* ya Hislop, mpe mingi ya masolo ya ntama, beno ke mona ti bawu vwandaka na malongi ya mutindu na mutindu kuna na kati. Ba vwandaka na kento mosi kuna na kati, mu lenda ve kutuba nkumbu ya yandi na ntangu yayi, mpe yandi ke mona bansimbulu ya kuswaswana mpe . . . na zulu ya ntoto, mpe kusala banzambi na kati ya bawu. Ba ke kwikilaka yawu ti ya vwandaka banzambi yina Jacob bakaka na bokilo ya yandi ya bakala, mwa banzambi yina ya bansimbulu mpe nyonso yina. Kaka mwa ba-isme, mpe bima yayi me basisa bisambu yayi yina beto ke mona na yinza bubu yayi. Kana beno tala nkadulu ya yawu, mpe nkadulu ya bima yayi bubu yayi, ya kele mutindu mosi ya yinza.

¹⁰ Na yina, Babylone vwandaka kaka na kati ya kiwanda ya ntoto ya mbote, mpe ya vwandaka ya kuziunga mpe ba vwandaka losila yawu masa na nzila ya Nzadi Euphrate, mpe Tigre. Mpe ya vwandaka kisika ya nene bilanga. Mpe Babylone vwandaka mbanza ya nene. Mpe ya kele, pene-pene, ya

bakilometele bankama zole na nziunga ya mbanza; bakilometele makumi tanu konso lweka, yina ke sala yawu bakilometele bankama zole na nziunga. Bawu ke tuba ti babala-bala na mbanza ya Babylone vwandaka bametele makumi sambanu na nene. Bibaka vwandaka na bametele makumi zole na ndambu na nene, mpe na kutala bametele makumi sambanu na yinda. Ba zolaka sala nsaka ya mbangu ya bapusu na zulu ya bibaka yayi, na bapusu. Mpe mielo vwandaka ya kusala na mutaku, mpe mielo yina kuna vwandaka ya bametele makumi sambanu nene. Mpe kuna na kati-kati ya mbanza vwandaka yinzo ya ntinu, mpe na yinzo ya ntinu vwandaka kiti ya kimfumu. Mpe kuna na kati-kati ya mbanza vwandaka luta nzadi ya nene, Euphrate. Kana beno ke mona yawu, ya kele mbanza ya diabulu, samu ti ba salaka yawu landila Mbanza ya Nzambi, mutindu Nzadi ya Luzingu kele na ntwala ya Kiti ya kimfumu. Mpe na kati ya mbanza yayi, bawu vwandaka na masamba ya nene, ya kitoko, na lweka ya bibaka, na nziunga.

¹¹ Mpe ya vwandaka yinsi mosi ya nene mingi, ya ngolo mingi na ntangu yina, tii kuna ya bulaka yinza yina me zabana, mpe yinza ya muvimba vwandaka futa kitadi. Yawu kwendaka ntama mingi na science, mpe yawu vwandaka na bima ya nsuka mingi yina bantu ya mayele lendaka basisa. Ya vwandaka na bapusu ya nsuka, bansalulu ya nsuka, bamakesa ya kulutula ngolo, mpe bisengo ya kulutula kitoko. Ya vwandaka ya kulutula mbote samu na yinza ya muvimba.

¹² Mpe na yina na kati ya bibaka yayi, kisika Ntinu Beltsashar yina vwandaka ntinu na ntangu ya diambu yayi yina beto ke tubila na nkokila yayi. Ntinu Beltsashar, yina Biblia ke tubila, “Nebucadnetsar, yina vwandaka tata ya yandi,” kasi ya kieleka ya vwandaka nkooko ya yandi ya bakala ti yandi yina yingaka, Ntinu Nebucadnetsar.

¹³ Mpe mingi na kati ya beno ke bambuka moyo ti Nebucadnetsar vwandaka mbandukulu ya Bantu ya makanda, yintu ya wolo. Mpe yandi kwendaka kuna na Jérusalem, na bakilometre mingi, ntama mingi, mpe kangaka ba-Juif mpe nataka bawu kuna na kimfumu ya yandi, mpe salaka bawu bampika, mpe salaka bawu bantu ya mayele mpe nionso yina.

¹⁴ Kaka mutindu Russie salaka na ntangu yawu kwendaka na Allemagne. Mpe ya kele samu na yina bawu kele na bombe atomique, mpe nionso yina, bawu kele na bantu ya mayele na Allemagne. Yawu yina bawu me kwenda na ntwala mingi bubu yayi, ba me kanga bawu mpe ba me vutula bawu kuna. Bawu mosi, bawu vwandaka na yawu ve, kasi bawu kwendaka mpe bakaka bima yina kaka mutindu Nebucadnetsar salaka na ba-Juif.

¹⁵ Mpe beto me mona ti, na ntangu yayi, ya vwandaka na muntu ya mbote na nkumbu ya Daniel, profete ya Mfumu, ba nataka

yandi na kimpika na ntangu yina. Yandi vwandaka sala kisalu mutindu mwana ya ntinu na zulu ya misadi ya bambwetete, mpe nionso yina, mpe bantu ya ndwenga mpe Bantu ya mayele, na kimfumu ya Ntinu Nebucadnetsar.

¹⁶ Mpe ntangu yayi Beltsashar vwandaka na luyalu. Beltsashar vwandaka bakala mosi ya nkú. Yandi vwandaka ve na boma.

¹⁷ Mpe na yina bantu nyonso ya Babylyone, na lukengolo ya mutindu yayi bawu vwandaka na yawu! Ntangu beno ke kota na mielo yina, mpe mielo yina vwandaka kangama, na bibaka ya bametele makumi sambanu yinda, bametele makumi zole na ndambu nene, beno banza kaka mutindu bawu fwana vwanda na kati ya bibaka yina!

¹⁸ Kasi beno bambuka moyo na yayi. Ata wapi mutindu mayele ya yinza me sala beno, Nzambi ke mona beno na nganda ntangu beno ke sumuka! Ya kele kaka na lukengolo mosi, mpe ya kele na kati ya Klisto Yesu.

¹⁹ Ntangu yayi, mutindu ba vwandaka kuwa mfunu ya nene ya kuvwanda yinsi yina vwandaka twadisa ya yinza, kifwanikisu ya nene, civilisation ya mutindu mosi na ntangu yayi beto ke na kuzinga, Amerique yayi ya kitoko. Mpe mu me vwalangana fioti, munu mosi, kasi mu ke na boma ti beto ke baka dibanza ya mutindu mosi yina bawu bakaka. Yina beto ke kuwaka samu ti beto kele, yina beto ke banzaka, bantu ya mayele ya kulutula mbote, mpe minduki ya kulutula mbote, mpe ba-bombe atomique, mpe ba-avion ya mbangu mingi, mpe beto kele mutindu . . . Beto kele yinsi yina ke na kutwadisa yinza, beto me kuma fioti na lukengolo kukondwa Nzambi.

²⁰ Ya kele kifwanikisu ya kitoko mingi. Mpe Nzambi ke sobaka ata fioti ve. Nkadulu ya Yandi na zulu ya disumu kele mutindu mosi bubu yayi mutindu ya vwandaka ntete. Mpe ya kele ve na kisika ya kubumbama na nsi awa. Kaka na kati ya Klisto beno kele na lukengolo.

²¹ Mpe na kati ya mbanza yayi ya nene, mutindu ba vwandaka banza ti ya vwandaka ve na mutindu, na yinza, samu na makesa mosi na kubebisa mbanza yayi. Bibaka ya nene, ya yinda, mpe bisadilu ya malu-malu, mpe bawu vwandaka ya kukabwana na yinza ya nganda. Kasi fioti ba zabaka ti yinsi ya nkú ba bokilaka ba-Medes mpe ba-Perses, yina kele ntangu yayi ba-Hindous ya Inde, wapi mutindu fioti ba zabaka ti na ba-kilometre mingi kuna ba vwandaka timuna mbeto ya masa, samu na kubalula Nzadi Euphrate, samu ti bawu lendaka luta na yisi ya bibaka. Ntangu bawu vwandaka banza ti bawu vwandaka na lukengolo! Ntangu nyonso bawu vwandaka banza mutindu yina. Kana bawu vwandaka banza mutindu yina, na yina bawu kwendaka tambula na kati ya disumu.

²² Ya ke monana ti ntangu muntu ke kuma na kisika yina yandi ke kuwa ti yandi kele ya kulunga na yandi mosi, disumu ke

banda na kukanga yandi. Dibuundu, yinsi, muntu yina ke banza ti yandi kele ve na nsatu ya lusalusu ya muntu yankaka, disumu ke bandaka na kuyala na kati ya yandi. Ya kieleka. Mpe beto ke mona, diaka, ti ntangu bantu ke banda na kubanza ti bawu kele na mbanzulu ya zulu mingi, ntangu nionso disumu ke kotaka mpe ke bebisa bawu.

²³ Na yina ntangu bawu kangaka bielo yayi, bawu banzaka ti bawu vwandaka na lukengolo. Kasi Nzambi talaka na nsi ya Mazulu! “Mpe disumu kele nsoni samu na yinsi nyonso.”

²⁴ Mu ke kukiyufula, na nkokila yayi, na bisadilu ya beto nionso ya nene, mpe ba-bombe atomique ya beto ya nsi ya masa, mpe ba-avion ya beto ya reaction yina ke pumbukaka na bankama ya ba-kilometres nkama mosi na sekonde mosi, ata mpe, to, na muniti mosi, yina lendaka luta mpe kibaka ya muningu. Kasi, beno zimbana ata fioti ve kasi masumu ya beno ke basisa beno na nganda!

²⁵ Mpe, na ntangu yayi, ba kangaka mielo. Mpe ba banzaka ti ba zolaka, ba lendaka kaka kuzinga na kati ya biese mutindu bawu zolaka, samu ba vwandaka na lukengolo. Ba vwandaka yinsi yina vwandaka twadisa, bayinsi nionso yankaka vwandaka sosa bawu samu na science mpe samu—samu na lusalusu.

²⁶ Mpe na yina, na ntangu yina, ya vwandaka . . . Ntinu yayi banzaka ti yandi zolaka kuzwa yandi ntangu mosi ya nene. Mpe yandi yidikaka kilumbu yina yandi zolaka vwanda na makinu ya nene, to, mutindu mu zolaka tuba, rock-and-roll ya bilumbu yayi; kulutila yawu ve. Mpe na yina yandi yidikaka ntangu yango, mpe yandi bokilaka bantu ya nionso ya lukumu, basoda nionso mpe bakapitene, mpe bakento ya yandi nionso mpe bamakangu.

²⁷ Ntangu yayi, makangu kele kaka kento ya kindumba yina kele na muswa. Mpe beno me mona, ntangu muntu ke banza ti yandi me lunga na yandi mosi, ti yandi ke banda na kutambula na kati ya disumu?

²⁸ Mpe yandi bokilaka malafu ya ngolo ya kulutila mbote yina yandi lendaka mona, samu na feti yayi ya nene ya rock-and-roll yina yandi zolaka sala. Yandi banzaka ti yandi vwandaka na lukengolo. Yandi banzaka ti ya vwandaka ve na kima mosi lendaka niongisa yandi, samu yandi vwandaka na lukengolo. Mpe yandi vwandaka na feti ya nene na kati ya mosi ya masamba yayi vwandaka manima ya yinzo ya ntinu. Mpe ntangu ba vwandaka kuna na kati ya disamba, ntangu yankaka ba vwandaka me yidika yawu nionso kitoko mingi, mpe bafololo nionso vwandaka ya kunamika, mpe ba vwandaka na bankento nionso ya makinu mpe bakento mingi samu na kukwisa kusepelisa basoda. Mpe ba-bière ya bawu mpe bamalafu ya bawu! Kana ya kele ve kutulama ya malu-malu ya feti rock-and-roll ya bubu yayi, mu zaba ve kisika mosi ke

vwanda. Ya kieleka. Mpe bawu yidikaka bima nionso, mpe bawu zolaka kuzwa ntangu mosi ya nene.

²⁹ Mpe na ntembe ve ti bakento mingi ya makwela kwizaka. Ba bikaka babakala ya bawu na yinzo bandesi, na yina bawu kwendaka samu na kuzwa ntangu ya mbote. Mpe yayi to yankaka, na ntembe ve mama mosi tambulaka na ntoto, na bébé ya kubela, na yina bakala mosi ya kulawuka malafu me basika samu na kuzwa ntangu mosi ya nene. Ya kele kaka sambanu ya mosi, mpe kati-kati ya kumi na zole yankaka.

³⁰ Mpe mu lendaka mona bawu mutindu bawu bandaka na kunwa mpe kuzwa ntangu mosi ya nene. Mpe mu lendaka banza kieleka ti ba bulaka kimvuka yango, mpe vwandaka na miziki. Mpe mwa bantwenia vwandaka benda mosi na yankaka. Mpe basoda, ya kulawuka malafu, vwandaka kanga bakento mpe vwandaka losa bawu na zulu ya bayintu ya bawu, mpe vwandaka pesa bawu bize mpe vwandaka vwanda na bakiti, mpe vwandaka boka. Na kubanzaka ti bawu vwandaka na lukengolo!

³¹ Oh, Amerika, Nzambi yina talaka kuna na feti ya kukola malafu, ya rock-and-roll, ke na kutala beno na nkokila yayi!

³² Mpe wapi ntangu bawu fwana kuzwa! Mpe mu lenda banza na ntinu yayi awa, Beltsashar, ya vwandaka Elvis Presley ya bilumbu yayi, yandi lendaka sala bima mingi ya bawu yina ba vwandaka na yawu. Mpe bakubendama ya bawu nionso, mpe bawu vwandaka zaba ve, ntangu nionso, ti lufwa vwandaka na kielo!

³³ Na yina, mutindu feti vwandaka ya kafu-kafu, ya vwandaka kaka mutindu kisika mosi ya nene ya emission ya Hollywood ya bilumbu yayi, bawu banzaka ti bawu ke samuna mwa bansaka ya mbote ya nsambulu; mutindu mvwatu ya Arthur Godfrey to kima mosi mutindu yina ya malu-malu bubu yayi, to Ernie Ford mubuki ya bambuma, ke samuna mwa bansaka samu na mulongi mosi. Kasi Nzambi ke talaka kaka na nsi kuna na Zulu! Kasi bawu banzaka ti bawu vwandaka zinga na yinsi ya mutindu yina ba lendaka simba ve. Kasi beno ke buka yina beno ke kuna!

³⁴ Beno sala keba na yawu, bantu. Ata ti beno kele yinsi, to dibuundu, to muntu mosi, beno ke buka yina beno ke kuna!

³⁵ Mpe, na yina, mu lenda mona ntinu yayi kutelama, mpe kutuba, “Beni vingila fioti, bana-bakento, beto sala nsaka mosi ya mbote ya nsambulu na zulu ya mulongi,” to nyonso yina.

³⁶ Mpe bafololo nionso vwandaka lezima, mpe bamama ya bantwenia vwandaka tuba, “Youpi! Yinga, mu ke kwikila ti beto ke zola kuwa yawu.”

³⁷ Mpe basoda ya bantwenia ke sala mutindu bantwenia ya bubu yayi, samu yayi kele ve kulutila Babylone ya bilumbu yayi! Mu kele Americain, kasi Daniel vwandaka na Babylone na ntangu yina. Kasi yina kele ve pardo samu na disumu!

Mu tubaka na mwana-kento mosi kilumbu mosi, “Nge kele Muklisto?”

Yandi tubaka, “Mu ke sala ti nge bakula, mu kele Américain.”

Mu tubaka, “Yina ke tuba kima mosi ve.” Ata fioti ve!

³⁸ Mu ke na kiese na kuvwanda Américain, kasi yina ke sala kima mosi ve samu na kutalisa Buklisto; kima mosi ve. Kana beto sumuka, beto ke futa samu na masumu ya beto, ya ke vwanda kaka na zulu ya beno.

³⁹ Ba vwandaka na profete kuna, kasi ba zolaka ve kuwa. Ba vwandaka na Nsangu, kasi ba zolaka kuseka Yawu.

⁴⁰ Kana ya kele ve Amerika ya bilumbu yayi, mu zaba yawu ve. Ba kele na Nsangu ya mbote, Kieleka, kasi ba ke zolaka kuseka Yawu.

⁴¹ Na yawu bawu tubaka, “Beto kwenda kuna mpe beto baka ba-vaze yayi ya ba-exalté, mpe beto nata yawu awa mpe beto kuzwa nsaka ya mbote na yawu.”

⁴² Nzambi ke pesaka muswa ve ti bansumuki kuseka bantu ya Yandi! Beno ke futa samu na yawu, kilumbu mosi.

⁴³ Mpe bawu kwendaka baka ba-vaze ya Mfumu, mpe ba nataka yawu na tempelo, mpe bawu ke kunwaka na ba-vaze ya Mfumu. Mpe ntangu ba mwangisaka Oertel ya 92 to Pabst Blue Ribbon ya bawu, na kati ya yawu, samu na kuvwanda na nsaka ya mbote kuna, oh, bawu kulumusaka ba-verre mpe bandaka, mpe bandaka na kunwa, mpe ke seka mpe ke vweza nsambulu ya Mfumu. Ba vwandaka zaba ve yina ba vwandaka sala.

⁴⁴ Mpe na yina ya kele yinsi yayi, na nkokila yayi, yina me zaba ve ti ba me manga Nsangu ya Mfumu Yesu Klisto, na mbotika ya Mpeve-Santu, mpe kubutuka mbala zole.

⁴⁵ Ata ti bawu vwandaka basambidi, ntangu yayi, feti ya kulawuka malafu ya rock-and-roll, bawu vwandaka misambidi, samu Biblia ke tuba ti, “Bawu ke sukisaka banzambi ya bawu.”

⁴⁶ Na yina beno lenda vwanda musambidi mingi, mpe kuvwanda kaka na yimbi! Ya kele kieleka. Ya kele ve ya bukieleka. “Nzila yina ke monana mbote samu na muntu, kasi kisina ya yawu ke lufwa.” Na yina ba vwandaka na dibuundu ya nene, mpe nsambulu yina ba lendaka sadila, mpe ba vwandaka vweza bima ya santu ya Nzambi.

⁴⁷ Mpe yina kele kieleka kifwanikisu ya bubu yayi, na kuvwezaka bima ya santu ya Nzambi. Ba bokilaka bantu, yina ke mekaka kuzinga ya kuvedila mpe na luzitu, mpe ya kusungama, ba ke bokila bawu “bantu ya ntama” to “saint-exalté,” to nkumbu mosi ya masakuba. Mpe ba ke bokila makabu ya Mfumu, yina Yandi ke na kusala, “Mpeve ke salaka na mpeve ya yimbi, mutindu nganga-nkisi to muntu ya yimbi.” Oh, wapi

mutindu beno lenda tina lufundusu? Menga ya bambangi ke telemina yawu! Kana Nzambi ke fundisa ve yinsi yayi samu na masumu ya bawu ya bilumbu yayi, Yandi fwana vumbula na lufwa Sodome na Gomorrhe, mpe kulomba bawu pardo samu na kubebisa yawu. Ya kieleka. Beto me kangama samu na lufundusu! Mpe mambu ya nene yayi yina beno ke mona Mvulusi ya beto ya kusakumuka ke na kusala, bawu kele bidimbu yina ke na kukebisa, ti lufundusu me kuma pene-pene; mpe yandi me kombula yinsi yayi na lweka mosi na yankaka, na Este tii na Weste, na Nord tii na Sud. Mpe bawu mangaka Yawu, seka Yawu, kusawula Yawu, ke sonika Yawu na mikanda ya bawu mutindu “buzoba.” Beno banza na yawu, Babylone ya bilumbu yayi!

⁴⁸ Ntangu yayi na ntangu bawu vwandaka kunwa, ke kotisa bambuma ya bawu na kunwa; na mbala mosi, na ntangu star yayi ya nene ya cinema, na nkumbu ya Beltsashar, yilamaka kaka samu na kubaka mbungu ya yandi, meso ya yandi monanaka ya kuvimba mutindu yandi balukaka mpe talaka na ntwala ya lupangu, samu yandi monaka, ke katuka na Zulu, diboko ya Muntu, mpe Yawu bandaka na kusonika na zulu mpe na nsi ya kibaka.

⁴⁹ Mu zola ti beno bakula yawu, Yawu sonikaka na zulu ya platre. Ntangu yayi, mu banza ti minda vwandaka kuna na bafololo ya yawu, kisika ba vwandaka na rock-and-roll ya bawu ya bilumbu yayi, mpe bansemo vwandaka sema na kibaka. Nzambi ke salaka ve bima na nsongi!

Ya kele kaka na ngaanda na yisi ya minda, kisika Nzambi ke zonzaka mpe ke tambulaka. Na yina bisono ya Yandi ya kimpeve vwandaka na zulu ya platre na kibaka, na ntwala ya bawu nionso.

⁵⁰ Mpe ntinu vwandaka me mona yawu muntu ya ntete, farceur yayi ya bilumbu yayi, comedien ya mbote ya radio, acteur ya television. Mutindu yandi balulaka dikopa, samu na kunwa, to mbungu, yina ya vwandaka na yawu na maboko, meso ya yandi vimbaka, mpe yandi ninganaka ya muvimba. Mu ke banza ti yandi salaka yawu. Biblia ke tuba ti, “Mikwa ya Yandi katukaka, na kisika ya yawu.” Ya kieleka yandi vwandaka tekita ya muvimba, ya kieleka. Ntangu Nzambi ke banda na kulakisa bidimbu ya Yandi, ya kele ntangu ya kuningana. Ya kele kieleka. Mpe na yina yandi bakulaka, nkunga ya yandi ya rock-and-roll me ningisaka yandi.

⁵¹ Mpe na yina ntangu yandi monaka bisono yayi na zulu ya kibaka, mu lendaka banza mwa mademoiselle ya fioti na bikoba ya kupakula mutindu mu zaba ve wapi mutindu, mpe bansuki ya yandi nionso vwandaka lezima, mpe vwandaka simba yandi kuna, mpe na basoda yayi ya kulawuka malafu, yandi tubaka, “Mu ke kukiyufula yinki kele diambu na mwana-bakala yayi na nkokila yayi?” mutindu yandi salaka oke.

52 Mpe bakala mosi ya ntwenia simbaka yandi, mpe yandi tubaka, “Mbote mingi, beto kina yayi ke landa kintwadi.” Mpe miziki sukaka.

53 Oh, yinsi yayi ya nene ya masumu, ntangu yankaka rock-and-roll ya beno ke suka! Kana beno kuwa ve ndinga ya mulongi, beno ke kuwa diboko ya Nzambi na lufundusu kilumbu mosi. Kasi rock-and-roll ke suka, kaka mutindu vwandaka sala bimvuka, mpe vwandaka bula *Nzambi Ya Munu, Pene-pene, Na Nge* na Titanic. Kilumbu mosi beno ke soba nkunga yina.

54 Mpe miziki sukaka. Mpe bawu talaka farceur ya bawu, star ya bawu—ya bawu na emission ya television, mpe, yandi vwandaka ya kutelama, mabolongo ya yandi vwandaka bula kintwadi, mutindu yandi talaka mpe monaka kima yayi ya nene vwandaka salama. “Kasi,” yandi tubaka, “bibaka nionso kele ya kukanga. Mu kele na mikengi ya munu ya kutelama na mwelo, muntu ya munu ya kusoola.”

55 Kasi, beno me mona, Nzambi ke kwisa ve na mwelo, mutindu beno ke banza. Yandi ke kulumuka na Nkembo! Mpe diboko ya Yandi vwandaka sonika na kibaka.

56 Mpe na nswalu, na kuvwandaka na kisika mosi ya bilumbu yayi, Biblia ke tuba ti yandi vwandaka me bokila bisyelo ya yandi nyonso, ba-astronaute, ba-évêque nionso, badokotolo, mpe ba-pape, ba-cardinal, mpe nionso yankaka. Mpe yandi tubaka, “Ntangu yayi mu ke tuba na beno, babakala ya lukumu, mu me pesa beno ntangu ya mbote ya kulonga mpe kusala yina beno me zola kusala. Ntangu yayi beno tendula, samu na munu, Yina kele na kibaka.”

57 Kasi kaka mutindu ya vwandaka na ntangu yina, mutindu mosi ya kele ntangu yayi, ba vwandaka ve ya kumesana na kimpeve. Ba zabaka kima mosi ve na yina me tadila Yawu. Bawu zabaka ve mutindu ya kutendula bandinga yina me zabana ve. Bawu zabaka kima ve na yina me tala ndinga ya Mazulu. Mpe bawu vwandaka yituka. Bawu zabaka kima mosi ve samu na Yawu. Mpe mutindu bawu nionso telemaka kuna . . .

58 Beno bambuka moyo, yayi ke nata kimfumu ya Bantu ya makanda. Mpe na yina ya ke kwisa na kimpeve, ya ke basika na kimpeve.

59 Kasi ba-évêque yayi mpe ba-cardinal, mpe badokotolo ya nene, lendaka ve kutendula kimpeve. Bawu zabaka kima ve samu na Yawu. Bawu talaka na kati ya babuku ya bawu nionso, mpe bawu monaka kima mosi ve yina lendaka fwanana na Yawu. Beno me mona, bima ya kimpeve ba ke bakulaka yawu na kimpeve. Mpe kuna bawu nyonso kotaka na kidi-kidi, mpe bawu vwandaka zaba ve yinki kusala.

60 Mpe, na nsuka, mwa ntinu mosi ya kento. Beno bambuka moyo, yandi vwandaka ve na feti ya rock-and-roll. Mpe mutindu mosi kaka yandi zabaka ti kima mosi ke salama, ndinga kwisaka

na yandi ti ntinu vwandaka tekita, mpe feti sukaka. Yandi zolaka vwanda na kimvuka ya bakwikidi ya mbote. Mpe, na mutindu mosi to yankaka, yandi vwandaka muntu yina zimbanaka ve.

⁶¹ Yandi kotaka na feti. Mpe mutindu yandi monaka farceur ya bilumbu yayi ke tekita ya muvimba, mpe kimvuka ya yandi nionso, yandi tubaka, “O ntinu, zinga mvula na mvula!” Kasi yandi zabaka ve ti yandi vwandaka ya kufwa kaka kuna. Yandi tubaka, “Zinga mvula na mvula! Mu zaba ti nge ke ya muvimba na mpasi samu na bisono yina na zulu ya kibaka. Mpe mu ke mona pape, mpe ba-évêque na ba-cardinal, mpe badokotolo ya théologie, mpe ata mosi ve na kati ya bawu lenda tanga Yawu. Kasi, O, ntinu, bika mu tuba na nge kima mosi! Ya ke na muntu mosi na kimfumu ya nge, yina zaba diambu ya kimpeve.”

⁶² Oh, mpangi-bakala, ntangu beto ke mona bisono na zulu ya kibaka, bubu yayi, kasi ya kele na Muntu yina me zaba yawu. Beno lendaka kwenda na bureau ya docteur nionso na kati ya mbanza, mpe ba me tuba na beno, “Beno fwana kufwa.” Kasi kele na Muntu mosi! Ntangu yankaka beno me dinda na disumu tii kuna moyo ya beno me kuma ndombe mutindu bibaka ya mvindu ya difelo, mpe beno me kubama na kukifwa, kukondwa kivuvu mosi. Kasi kele na Muntu mosi, mpe Nkumbu ya Yandi kele Yesu! Yandi zaba diambu ya kimpeve. Mpe Yandi kele na Kimfumu ya beto, samu ti beto kele bana ya Kimfumu ya Yandi. Ya kele na Muntu mosi!

⁶³ Yandi tubaka, “Yandi zaba diambu ya kimpeve, bamvula me luta bawu monaka Mpeve ya Nzambi na kati ya yandi. Mpe yandi vwandaka na Mpeve ya kulutila mbote. Yandi lendaka tendula bandosi, yandi monaka ba vision, mpe mosi na mosi na kati ya yawu vwandaka kaka ya kieleka. Na yina, kuvwanda ve na kidi-kidi, pesa munu kaka baminuti fyoti mpe mu ke nata yandi awa.”

⁶⁴ Ya ke vwanda na kilumbu mosi beno ke bokila Yandi! Beno lenda vwanda ve na kivinga samu na Yandi na yinzo ya beno. Beno kele na kizitu mingi, samu na kutala television, kubula bakalati, kunwa bière, kukwenda na bafeti ya rock-and-roll. Kasi ya kele na ntangu mosi beno ke bokila Yandi! Ya kele kieleka.

⁶⁵ Mpe na yina ba kotisaka Daniel. Mpe mutindu ba kotisaka yandi. . . Mulongi ya ludedomo, muntu ya Nzambi! Mu lenda banza ve muntu ya Nzambi kuzinga na kisika ya mutindu yina kasi yandi ke nganina yawu. Kasi, beno me mona, ntinu vwanda kipe Yawu ve, ya kele samu na yina yandi vwandaka na mutindu yina yandi vwandaka.

⁶⁶ Mpe bawu nataka Daniel, mpe yandi tubaka, “Samu na yinki ba-pape ya nge mpe badokotolo lendaka ve kutendula yawu na nge?” Bawu vwandaka na kima ya kutendula na yawu ve.

67 Na yina yinki salamaka? Daniel tubaka, “Oh, Beltsashar, beno me zaba bima yayi nionso. Ba me bumba yawu ve na nge.”

68 Mpe mu ke tuba na Amerique! Mu zola sala ti bawu, na muniti yayi, kuwa ndinga ya munu. Beno kele ve kukondwa kuzaba bima yayi nionso! Mutindu bayinsi na ntwala me sumuka mpe me sala yina beto me sala, ba me tula beto na kitezolo, mpe ba me mona beto mpamba. Yinki salamaka na France? Yinki salamaka na Allemagne? Yinki salamaka na bayinsi yankaka yina kwendaka na “vinu, bakento, mpe ntangu ya nene”? Ya ke basikaka ntangu nionso na nzila yina, mpe beto kele ve ya kukebama samu na lufundusu. Nzambi kele ya kusungama.

69 Mpe yandi tubaka, “Tata ya nge, wapi mutindu Nzambi me sala yandi yinsi ya nene, kasi yandi me zimbana yawu. Mpe yandi salaka bima ya mutindu mosi yina beno ke na kusala, mpe Nzambi sobaka yandi na niama ya mfinda.” Yandi tubaka, “Beno me zaba bima yayi, mpe na yina beno ke baka ba-vaze ya Yandi ya santu mpe ke sakana na yawu.” Beno tala. Yandi tubaka, “Ba me tula bisono na kibaka, mpe ntangu yayi ba me tanga kimfumu ya nge.” Na nzonzolo yankaka, “Tala awa, nkundi, bilumbu ya nge me tangama! Ba me katula kimfumu ya nge mpe ba me pesa yawu na yinsi yankaka, yinsi ya ngolo, ya kukondwa Nzambi,” mosi yina kele—yina kele mbote ve mutindu bawu kele. Nzambi ke salaka disumu kunwana na disumu. Mu ke kukiyufula, bubu yayi!

70 Kaka na ntangu yina, mu lenda tuba ntete, ntangu yandi vwandaka ya kutelama kuna, vwandaka tala mbote Bisono yina na zulu ya kibaka, yandi zabaka fioti ti kaka kuna na nsi ya mielo, kaka kuna, mikengi kufwaka. Mpe basoda vwandaka na babala-bala, ba vwandaka kufwa mikengi ya yinzo ya ntinu. Bawu vwandaka na zulu ya bimatinu. Mpe bakento yina vwandaka ya kutelama kuna, ntama na ba-bébé ya bawu, ntama na babakala ya bawu, mpe babakala na bakento ya bawu, bawu nionso vwandaka me kulawuka malafu, ba vwandaka kuwa mwa makinu ya bilumbu yayi mpe vwandaka landila. Mpe basoda vwandaka na zulu ya bimatinu, na mwa minuti fioti ba zolaka kufwa ntinu. Nkonga nionso yina ya bantu ya kukola malafu zolaka kufwa, na nzila ya yinsi yina ya mimpani, yina kele na bampeve ya yimbi. Mpe bakento vwandaka katula bilele ya bawu, bantwenia ya bakento mpe bawu nyonso, mpe basikaka na bala-bala; na yina ba simbaka bawu na binkoso, mpe panzaka bayintu ya bawu na bibaka. Ba zengaka bawu na manima ba zingaka na bawu na kindumba; basoda ya kulawuka, ya kulawuka malafu! Ya vwandaka na kielo, samu ba tezaka bawu na kitezolo, mpe ba monaka bawu mpamba.

71 Mpe mu ke kukiyufula, bubu yayi, na mambu ya beto nionso ke na kusalama, ke seka nionso mpe ke vweza balukutakanu ya kubeluka ya nzutu, ke seka mpe ke vweza Dibuuundu ya Nzambi ya moyo, mpe ke landila mutindu Biblia ke tuba ti bawu ke sala,

“Bantu ya lunangu, bantu ya luzabu, ke na mutindu ya kinzambi, kasi ke manga yina ke pesaka Ngolo.”

⁷² Mu ke kukiyufula, na kilumbu yayi ntangu beto ke banza ti beto kele na lukengolo mingi, mpe, na mbala mosi, beto ke mona ti Russie kele na bamvula tanu na ntuala ya beto, na mayele ya bantu.

⁷³ Beto me vwanda na bafeti mingi. Beto me tambula mingi na disumu. Dibuundu kele ya kulala mingi, ya ke kipe diaka ve balukutakanu ya bisambu. Ba ke kipe yawu ve. Bawu, mpe, ke tula ndinga samu na kutelemina Mpeve ya kusungama, ya kieleka Nzambi ya moyo; bawu ke kuzwa yawu ve.

Bawu kele mingi denomination, ya kulwata mingi! Ba ke na ntangu ve samu na balukutakanu ya bisambu, ba ke na ba-television mpe bisika ba ke talisaka bafoto, mpe ke sote kuna, mpe na bafeti ya kulawuka malafu mpe bima. Ya kele kieleka!

⁷⁴ Yina lenda wakana mutindu ya ntama, kasi yina kele nsatu ya yinsi bubu yayi. Ya kele na bansusu mingi me pola na masa na Nsangu ya mbote, na ba-gang na maboko. Ba fwana simba Yawu na maboko ya mpamba, na Mpeve-Santu. Ya kieleka!

⁷⁵ Billy Graham tubaka, pene ya sabala mosi to zole me luta, na mosi ya bansangu ya yandi, yandi tubaka, “Yinsi yayi lenda kuma satellite samu na Russie, na konso ntangu yina Russie me zola.” Wapi kisika beto kele?

⁷⁶ Beno ke sumba bankunga ya Elvis Presley, mpe beto ke bikana na yinzo na kisika kukwenda na yinzo-Nzambi samu na kuwa *Beto Zola Suzy*, mosi ya bilumbu yayi! Ba me meka beno na kitezolo, mpe ba me mona beno mpamba! Yinki me salama? Ya kele na bisono na zulu ya kibaka!

⁷⁷ Bantu ya Russie me tula sputnik mosi yina beto lenda twadisa kima mosi ve samu na yawu, nkama nana ya ba-kilometre ntama na ntoto; mpe ba lendaka tula ndambu ya kumi na zole na zulu ya Etats-Unis na minuti makumi tatu ke kwisa, mpe kubokila mpe kutuba, “Bika, to nge ke vwanda kinkuku ya mbombi na mwa minuti fioti.” Ba lenda sala yawu. Ya kele ve na kima yina beto lenda sala samu na kutelemisa bawu. Ya kele na maboko ya bawu, bantu ya kukondwa menga, ya kukondwa ntima, ba-communiste ya kukondwa busantu! Yawu yina Nzambi ke salaka samu na kunata disumu na nsemo. Ya kieleka. Kana beno ke tanga Biblia, Russie fwana sala yawu landila Apocalypse. Mbote mingi, beno milongi ya profesu lendaka swaswana na Yawu, kasi beno vingila kaka tii ya ke suka. Ba me tula Russie awa samu na lukanu yina. Biblia me tuba mutindu yina.

⁷⁸ Ntangu yayi yandi kele awa na sputnik. Beto mekaka kubula munduki na nkokila yina, beto banzaka ti beto ke sala kaka mutindu bawu salaka; ya zangukaka na metele mosi na ntoto, mpe yawu me panzana. Rock-and-roll mingi mpe disumu! Ba me

tula beto na kitezolo, mpe ba me mona beto mpamba. Nzambi, tala kyadi!

⁷⁹ Yinki beto ke sala? Yinki ke salama kana ba ke tinda ba-sputnik yina kuna na zulu, na ba-missile yina, mpe kutuba, “Bika, to nge kuma kikunku ya putulu na baminuti tanu”? Ya kieleka, luyalu na beto, samu na kuvulusa luzingu, zolaka bika. Yawu yina kaka kima bawu lenda sala.

⁸⁰ Na yina yinki ke salama na bayankaka na kati ya beno ba-Américain, beto nionso awa; awa ve, kasi mu zola kutuba samu na yinsi? Mu zola tuba samu na yinsi!

⁸¹ Beno nkonga ya bantu ya mayele ya yimbi, ya bana-bakento yina ke kima mbangu na mwa bikoba ya beno ya kupakula mutindu mwa bouton ya rose; mpe ke seka mulongi mosi kuna na nsongi, ke longa Nsangu ya mbote. Mpe beno, bantwenia ya fioti, yina ke banzaka ti beno fwana vwanda na bumuntu mingi kulutila beno fwana vwanda na mayele ya kutwadisa!

⁸² Yinki ke salama na beno, tata, yina ke vwandaka na yinzo na nkokila na mama mpe ke tala television, na ntangu junior kele kuna na hot rod, mpe mpangi ya kento kele kisika mosi kuna na kantini, mpe yandi me vwanda kuna ke sala rock-and-roll ya yandi? Mpe beno ke na kutala television, mpe ke vweza Nsangu ya mbote!

⁸³ Yinki ke salama na beno, mambele ya dibuundu? Yinki ke vwanda nsuka ya beno? Beno lenda vwanda na nkumbu ya beno na babuku nionso, ya dibuundu ya kulutila nene na kati ya mbanza; kasi kana ti beno kele ve na nsi ya lukengolo ya Menga ya Mfumu Yesu, beno ke kufwa na bayina ke kufwa, ya kele ve na kivuvu samu na beno.

⁸⁴ Yinki ke salama? Ya ke na sputnik mosi kuna na zulu. Mpe yinki ke salama? Yinsi yayi ke bika, ya kieleka, yina kele kima mosi kaka ya mbote luyalu lendaka sala.

⁸⁵ Na yina yinki ke salama? Kitembo na manima ya kitembo, ya masuwa ya kufuluka na basoda; kitembo na manima ya kitembo, ya ba-avion; ke kubwa na yinsi yayi. Ba ke botula bakento na babala-bala. Yinki beno ke sala? Ya me kuma ya bawu. Ba ke basisa beno na nganda ya yinzo ya beno, ba ke botula yawu.

⁸⁶ Yinki ke salama na beno bana-bakento ya bantwenia, mpe beno babakala ya bantwenia, mpe beno nionso na ntangu yina? Disumu fwana futa samu na yawu! Ata yinki yinsi ya kele, to nani ya kele, ya ke sala yawu. Muntu mosi, to yinsi mosi, ke futa samu na yawu! Mpe nkonga ya basoda ya ba-communiste ya kingolo-ngolo, ya kukondwa busantu, na mandefu ya yinda, ke baka bakento ya beno mpe ke botula bawu, bana ya beno ya bakento ya bantwenia. Mpe beno ke telama mpe mutindu yawu, ya kele na kima ve beno lenda sala na yawu.

⁸⁷ Yinki ke sala yawu? Samu beno me kuwa bima ya mvindu na manaka ya television samu na rock-and-roll mpe disumu, mpe mwa mulongi mosi ya madidi ya mambu ya nganda lenda ve kutendula mambu ya kimpeve. Biso ke na zulu ya kibaka! Ya kele kieleka! Mpe ba me tula beto na kitezolo, mpe ba me mona beto mpamba.

⁸⁸ Wapi ntangu ya lendaka salama? Na ntwala kubasika ya mwini na suka. Nani ke kanga yawu? Beno meka yawu. Biblia ke tuba ti ya ke salama.

⁸⁹ Kasi beno bika mu tuba na beno, yina ke simba ata fioti ve Dibuundu ya Nzambi ya moyo, beto ke vwanda me kwenda na ntangu yina!

⁹⁰ Na yina, nkundi, widikila. Kana kima yina me kuma pene-pene mingi, mpe beto ke mona biso na kibaka, kima mosi ve lenda kanga kima yayi na kusalama ntangu yayi.

⁹¹ Amerika me longama na yawu, mambu ya kimpeve me salama, mpe ntangu nionso ba me tambula kaka na zulu ya Yawu.

⁹² Beno kwenda na yinsi mosi kisika mosi kuna mpe beno sala lukutakanu ya reveal, mpe beno kuzwa bandimi makumi yiya na sabala mosi; mpe beno vutuka na basabala samanu, beno ke kuzwa ve yiya. Kiziba yayi ya ntama vwandaka ya kuyuma. Nzambi ke na mingi yina Yandi me soolaka. Mpe ntangu yina ya nsuka ke kota, yina ke kanga kielo mpe yawu ke suka.

⁹³ Na yina ya kele ve na kima me bikana kasi lufundusu ntangu ba me manga kyadi. Mpe awa beto kele na nsuka ya nzila.

Mambu ya kimpeve me salama, ba me seka Yawu mpe ba me vweza yawu. Mpe kima ya nsuka, Nzambi me kwisa na Ngolo ya Yandi Mosi, na Mwana ya Yandi Mosi ya Zola, samu na kusala na nzila ya Dibuundu ya Yandi, mpe bawu ke tuba ti Yawu kele “bunganga,” to, “diabulu.” Yinki yankaka lenda bikana kasi lufundusu? Mpe tala biso na kibaka!

⁹⁴ Kasi, kana ya kele pene-pene, mpe mulongi nyonso zaba ti Dibuundu ke kwenda na Enlevement na ntwala lukwamusu kuzwanda. Na yina kana yina me kuma pene-pene, ya lendaka salama na ntwala ya suka, yinki samu na Enlevement? Ya me kuma pene-pene mingi kulutila yina! Oh, Nkumbu ya Mfumu kusakumuka! Nkwizulu ya Mfumu me kuma pene-pene. Biso me sonama, mpe ya kele ya kusonika na Biblia, mpe beto ke na kuzinga samu na kumona yawu.

⁹⁵ Beno zola, na nzila ya ndinga ya munu, kundima Yesu Klisto na ngunga yayi? “Beno balula ntima, mpe beno botama,” Pierre tubaka, “beno nionso, na Nkumbu ya Yesu Klisto, samu na mulemvo ya masumu, mpe beno ke kuzwa dikabu ya Mpeve-Santu; samu ti nsilulu kele samu na beno, mpe samu na bana ya beno, mpe samu na bayina kele ntama. Samu ti ya kele ve na

nkumbu yankaka yina me pesama na yisi ya Mazulu na kati-kati ya bantu, na yina beno fwana kuzwa mpulusu.” Kaka na yina ya Klisto! Beno lenda vwanda Méthodiste, Baptiste, Pentecote, Nazaréen, Katolika, beno kele ya kuzimbana tii beno ke kuma ya Klisto! Mpe Klisto ke kota na kati ya beno, ya kele Lubutuku ya malu-malu na nzila ya Mpeve-Santu. Beno yamba Yandi na nkokila yayi, na yina beto ke sambila.

⁹⁶ Na bayintu ya beto ya kukulumusa. Mu ke kukiyufula mutindu yayi, bantu yikwa na kati awa yina zaba ti kima ya nene yayi ke salama? Beno lenda kwenda na mbeto na nkokila yayi na kento ya beno, mpe na suka yandi ke kwenda. Beno, tata na mama, beno lenda pesa bize na bana ya beno ya fioti samu na kulala, na nkokila yayi, mpe mbasi na suka mwa mbeto ke vwanda ya mpamba. Mpe beno ke kwenda mbangu na bala-bala, samu na kutala yinki me salama na Mama Jones, yandi me kwenda, diaka. Enlevement me kuma pene-pene, Biblia me pesama pwelele.

⁹⁷ Mpe na lukutakanu yayi, na ntangu beno kele na siansi, kaka mutindu babakala ya—ya mayele, mpe bakento ya mayele, samu na yinki beno ke sala keba ve na kubokila yawu na kati ya ntima ya beno, mpe kutuba, “Mfumu Nzambi, fulusa munu na Luzingu yina ya Kukonda nsuka.” Samu, kana mpeve ya beno kele kaka na mabanza ya mayele ya bantu, beno kele pepele mingi. Kasi Mpeve ya Nzambi, yina me katuka na Mazulu, ke kwiza na kati ya ntima ya beno mpe ke pesa beno Mpeve-Santu, na kati ya beno. Ntangu lukwamusu ke kwisa, Mpeve (Mpeve-Santu) ke vutuka na Kiyidiki ya Yawu, mpe beno ke kwenda na Yawu. Ata ti beno kele musambidi, ya ke kwenda ve kana ya kele ve na Kima na kati kuna samu na kubaka beno.

⁹⁸ Bantu yikwa na nkokila yayi, na bayintu ya beno ya kukulumusa, na ntwala ya Nsangu yayi, zola telemisa maboko ya beno na Klisto, mpe kutuba, “Nzambi, fulusa munu na Mpeve-Santu ya Nge. Mpe kana Nge ke kwisa, mu zola kwenda na Nge”? Beno zola telemisa maboko ya beno? Nzambi sakumuna beno, kaka bisika nyonso na dibuundu. Na kutanga, bankama zole, to kulutila, me telemisa maboko na zulu.

⁹⁹ Nkundi ya munu ya nsumuki, kana nge me ndimaka Klisto ata fioti ve, nge lenda telemisa diboko ya nge ntangu yayi, mpe kutuba, “Mfumu Yesu, lemvokila munu”? Nzambi sakumuna nge, mama. Nzambi sakumuna nge awa, nge na manima kuna. Muntu yankaka, “Bambuka moyo na munu kaka, Mfumu.” Nzambi sakumuna beno awa, na nsi awa. Mfumu kuvwanda na beno. “Bambuka moyo na munu, O Mfumu. Meso ya munu me zibuka. Mu zaba ti ntangu yankaka mu ke tubaka ti mu kele Muklisto kubanda ntama, kasi mu me zabaka ata fioti ve yina kele kubutuka mbala zole. Mu me kuzwaka ntete ve Mpeve-Santu.”

¹⁰⁰ “Na yina, kana muntu me butuka ve mbala zole, yandi ke vwanda na ndwenga ve na kukota na Kimfumu, to lendaka ve kumona Kimfumu.”

¹⁰¹ Beno zola kutelemisa diboko ya beno, mpe kutuba, “Lemvokila munu, O Mpeve-Santu. Mpe ntangu Nge ke kwisa samu na Dibuundu, baka munu”? Nzambi sakumuna nge, mama. Muntu yankaka zola, “Bambuka moyo na munu, O Nzambi.” Sakumuna nge, tata. Nzambi sakumuna nge, mama. “Bambuka moyo na munu, O Nzambi.” Nzambi sakumuna nge awa, ntwenya ya bakala. Nzambi sakumuna nge kuna, mama. Kuna na manima, mama ya ntwenya, na manima. Mpe nge na manima kuna, mama. “Lemvokila munu, O Nzambi, ntangu mu ke mona bisono keke na zulu ya kibaka. Mu keke na mayela mingi, tuba, samu na kumona yina ba me tuba na Biblia, na nkokila yayi, ti yayi keke disolo yina ba me vutukila.”

¹⁰² Beto me kuma na nsuka. Kima mosi ve lenda sadisa. Kima yina ke bebisa yinza keke na maboko ya muntu ya masumu.

¹⁰³ Ya keke kaka mwa fioti diaka. Beno fwana vwanda ya nsuka yina ba me tuma na kukwisa na Klisto. Ntangu muntu yina ya nsuka ke kwisa, lufundusu ke bula; ke kondwa kima mosi, yina lenda vwanda beno. Beno zola kuyamba Yandi na nkokila yayi na yina beto ke vingila?

¹⁰⁴ Kaka makumi zole, maboko makumi tatu me telema. Ntangu yayi beto keke ve na kisika awa samu na kusala lubokilu na autel, samu na kunata bantu na ntwala awa, samu ti beto keke ve na kisika. Kasi mu ke yufula beno, ya kieleka, oh, beno vwanda ya kusungama mpe beno kuwa ndinga yina ke kebisa. Beno vwanda ya kusungama mpe beno lomba na Klisto, kaka kisika beno keke ya kuvwanda, “Mfumu, lemvo kila munu, nsumuki, mpe yamba munu ntete mu luta na zulu ya vwale ya kyadi. Ntete mu sumuka kilumbu ya munu ya lemvo kuluta, wila munu mawa, Mfumu,” mpe Yandi ke sala yawu.

Ntangu yayi beno sambila mutindu yina na ntangu mu ke sambila na beno.

¹⁰⁵ Mfumu ya kusakumuka, beto me telema na mpasi ya nene na nkokila yayi. Na yina beto ke tanga Ndinga ya Nge, mpe beto zaba ti konso ngunga yina ba-radio lendaka lezima, mpe kimvuka ya rock-and-roll ke kwenda samu na kuyimbila *Nzambi ya Munu, Pene-pene, Na Nge*, kasi ntangu me luta mingi, lufundusu me kubula. Ba me ludika ba-missile na beto. Kubeba, ba-kilomètre na manima ya ba-kilomètre, ba-tonne na manima ya ba-tonne ya—ya ba-bombe ya energie ke kombula ntoto, mpe nionso yina, yina ke tula tiya na yinza ya muvimba. Mpe ya keke na maboko ya muntu ya masumu. Mpe Biblia ke tuba ti ya ke sala mutindu yina. Mpe beto ke mona bisono na zulu ya kibaka.

¹⁰⁶ O Mfumu Nzambi, mu me lunga ve na kumeka kulonga Nsangu ya mutindu yayi na bantu. Mpe mu ke na kutala mutindu

mu kele fioti, ya kutelama awa, samu na kumeka na kusimba dilongi ya mutindu yayi, kasi Nge ke lemvočila munu samu na kitini ya munu ya kukondwa kuvwanda na lenda ya kusala yawu. Kasi na mutindu nionso, na ntima ya munu, mu ke lombamba Nge na kukotisa Nsangu, mutindu Nge ke sala yawu, na kati ya bantima ya bawu, samu ti mu ke na kumona ngunga me belama. Mpe vwanda na kiadi, Nzambi, mpe vulusa mosi na mosi, mpe fulusa bawu na Mpeve-Santu. Mpe bika ti bawu vwanda bana ya Nge, na mutindu ya Kinzambi ya kubumba na mambote ya Nge, mpe bawu kuzwa lukengolo na Mfumumu Yesu.

¹⁰⁷ Na yina, yinsi ya beto kele ve na lukengolo. Beto vwandaka banza ti beto vwandaka mutindu yina. Mutindu yina Kimfumumu ya Babylone vwandaka banza, kasi, ntangu nionso, ya vwandaka na yinsi ya bantu ya nkú yina vwandaka sala. Mpe ya vwandaka na yinsi ya nkú yina vwandaka sala, tii ntangu yayi beto zaba ti ba kele na ntwala ya beto, mpe beto kele na maboko ya bawu.

¹⁰⁸ Mfumumu, Dibuundu kele na maboko ya Nge. Bawu ke beba; kasi Nge ke baka Dibuundu ya Nge. O Mfumumu, nata beto na lukengolo ya Nge, na nkokila yayi. Mpe sakumuna beto samu na zola ya Yesu; mpe na Nkumbu ya Yandi beto ke sambila. Amen.

¹⁰⁹ Na lembami nionso, muniti mosi. Beno wanda na luzitu.

Na lembami mpe na lutondo Yesu ke bokila,
Ke bokila nge mpe . . .

Na yina beto ke na kuyimba ntangu yayi, beto ke na kukitalaka.

. . . na Mwelo Yandi ke na kuingila mpe ke na kutala,
Ke tala nge na munu.

Beno vutuka na yinzo . . . (Wapi? Beno mata,
beno mata mingi.)
Beno yina kele ya kulemba, beno vutuka na yinzo;
Na lembami, na lutondo, Yesu ke bokila,
Yandi ke bokila, O nsumuki, vutuka na yinzo!

[Mpangi Branham ke niunguta *Na lembami mpe na Lutondo*—Mu.]

¹¹⁰ Oh, ya ke vwanda ve ntangu ya mbote samu na yawu na kusalama kaka ntangu yayi! Oh, ya kele mbote, konso ntangu yina Yandi kele ya kuyilama. Amen! Mu ke na kiese mingi na kuzaba Yandi. Mu ke na kiese ti nzutu yayi ya ntama ya kulemba, yina ke mata awa, ke soba na ntangu fioti, na mbwetolo ya disu. Mu ke vutuka diaka ntwenia ya bakala, samu na kuzinga kukonda nsuka.

Kiboba ke vwanda ntwenia kuna kukonda
 nsuka,
 Ya ke soba na mwa ntangu fioti;
 Yina ke kufwaka ve, ke telama mutindu Yandi,
 Bambwetete mpe mwini ke sema.

Wapi bweso yayi! Beno manga Yandi ve.

Oh, wapi mutindu beno ke zola Yandi kutuba,
 “Ya me salama mbote,”
 Na Kilumbu yina ya Kukonda nsuka!
 Beno manga ve Mvulusi ya luzolo na ntima ya
 beno,
 Beno manga Yandi ve. (Bika ti yayi kuvwanda
 na nokokila.)

¹¹¹ Bantu yikwa zola Yandi na ntima ya beno ya muvimba, mpe beno me kubama kana Yandi lendaka kwisa? Oh, wapi mutindu beto ke vutula matondo! Beno ke na nsatu ti beno me sukulama ya muvimba na ntangu yayi, na kati? Nsangu ya mbote, beto me sukulama na masa ya Ndinga. Beno tanda diboko ya beno kuna, mpe beno pesa mbote na muntu mosi, beno tuba, “Nzambi sakumuna nge. Mu ke na kuwa kaka mbote. Nzambi sakumuna nge, kizieti. Nzambi sakumuna nge, mpangi-kento, mpangi-bakala.” Beto kele bantu yina kele na nzila.

Mu ke tambula na bala-bala ya nene ya ntama,
 Na kutubaka bisika nyonso mu ke kwenda,
 Mu zola vwanda Muklisto ya mutindu ya
 ntama, Mfumu,
 Kuluta nyonso mu zaba.

¹¹² Ntangu yayi mutindu beto kele kaka na ntangu yayi ya luzitu, Mu ke kwikila ti ntangu me luta fioti samu na kubokila ndonga ya bisambu. Beto. . . Mu ke kwikila ti Mpeve-Santu me sepela, na ntalu yayi ya nene ke kwisa na Klisto. Ntangu yayi beno kuzwa dibuundu mosi na nswalu nionso, beno botama mpe beno kwenda na dibuundu yina, Dibundu ya mbote yina me fuluka na Mpeve, mpe beno vwanda kuna ntangu nionso beno ke zinga.

¹¹³ Yinki kele bisalu yina Klisto silaka ti Yandi ke sala? Yandi tubaka, “Beno mpe ke sala bisalu yina Mu ke sala, beno mpe ke sala yawu.” Na yina, Mvwandulu ya Yandi kele awa. Na yina, mu zaba, bankundi. Mu—mu zaba, kukondwa ntembe, ti Yesu kele awa. Ya kele na Bakala awa, Ya kele Bakala mosi yina tambulaka kuna na Galilée. Ya kele Muntu mosi yina vulusaka beno na Menga ya Yandi, mpe belusaka beno na bamputa ya Yandi. Mpe Yandi kele awa samu na kulungisa mpe kusala nionso yina Yandi salaka, samu Yandi kele Mfumu Yesu mosi.

¹¹⁴ Ntangu yayi beto sambila kaka mwa ntangu fyoti, na pima. Beno vwanda kaka na bisambu na yina mu ke na kumeka na kuzwa dibanza ya Mpeve-Santu.

115 Na yina, yina kele muziki ya kitoko, wapi mutindu bantu yina kele na kati ya mpasi na nkokila yayi ke zola kuwa yawu! Bantu yina vwandaka kieleka na kiti yina beno kele ya kuvwanda na nkokila yayi, me kuwa Nsangu ya mbote, mpe me lutisa, kele na kati ya mpasi na nkokila yayi, wapi mutindu bawu ke zola kubaka kisika yina beno kele ya kuvwanda; mpe ya me kuma ntama ntangu yayi.

116 Mfumu, Nge Yina salaka Mazulu mpe ntoto, Nge Yina fidisaka Mfumu Yesu ya kusakumuka awa na ntoto; mpe na kati ya Yandi vwandaka zinga muvimba ya Mpeve. Mpe Nge me tuba, na nzila ya bikoba ya Yandi, “Mu kele Vinu, beno kele mavala. Vinu ke butaka ve mbuma na Yawu mosi, kasi mavala ke butaka mbuma.” Mu ke sambila, Nzambi, ti Nge ke kukitalisa Nge mosi na nkokila yayi, na kati ya beto, ti bantu yayi lendaka zaba ti Nsangu yina me longama, ti me katuka na Nge, ti Nge ke na kukebisa beto na kukubama, mpe bilumbu ya nsuka me kuma pene-pene.

117 Ya lenda vwanda na bambevo ya kuvwanda awa, Mfumu. Pesa bawu kikesa, ti bawu fwana kubeluka, samu beto ke lomba yayi samu na nkembo ya Nzambi. Ntangu yayi, Mfumu, mutindu beto me kukipesa beto mosi na Nge, mutindu Dibuundu ya Nzambi ya moyo; na kutalaka, mu banza, konso diboko awa me telema na zulu. Mpe mu ke lomba Nge, na nkokila yayi, Mfumu, na kusala kima ya ngitukulu samu na beto. Mpe sala kaka na ntangu yayi ti bantu yayi lenda kukipesa bawu mosi na nzila yina Mpeve-Santu ke twadisa bawu, na lukwikilu yina, mpe mu fwana kukipesa munu mosi na Nge, mpe Nge lenda sala na nzila ya makabu ya Nge mpe ke kukitalisa Nge mosi na kati ya beto; ti, ya lenda vwanda na banzenza na kati-kati ya beto. Beto ke lomba na Nkumbu ya Yesu. Amen.

118 [Kisika ya mpamba na bande—Mu]. . . samu Yandi ke talisaka ntangu nionso mawa na ntwala ya lufundusu. Mu ke lomba kaka balongi na kuvwanda kuna, mpe beno sambila. Beto sambila.

119 Mpe ntangu yayi, mingi-mingi, mu me longa, mpe mu—mu ke yufula mbala yankaka beno awa na ntwala, to konso kisika yina beno kele, beno banda kaka na kutuba yayi. Biblia ke tuba ti, “Yandi kele Nganga-Nzambi ya Mbuta yina lenda simbama na nsatu ya bimbevo na beto.” Mbote, na yina, kana Yandi kele Nganga-Nzambi ya Mbuta yina vwandaka mazono, Yandi kele mutindu mosi bubu yayi; na yina diambu yina Yandi salaka mazono, Yandi ke sala bubu yayi kana Yandi kele mutindu mosi. Ya kieleka? Na yina kana Yandi lenda simbama na ntangu yayi, beno ke simba Yandi na nsatu ya bimbevo ya beno, mpe beno bika Yandi kutuba.

120 Beno banza kaka, ntangu Yandi telemaka pene-pene ya nkonga ya bantu mutindu yayi, bakala mosi kwisaka kuna, na

nkumbu ya Pierre, to nkumbu ya yandi vwandaka Simon. Mpe Yandi tubaka, “Nkumbu ya nge kele Simon. Nge kele mwana ya Jonas. Kasi, kubanda ntangu yayi, ba ke bokila nge Pierre.” Nani yandi me kuma? Ntumwa ya luzolo.

¹²¹ Ntangu Philippe monaka Nathanael, mpe yandi kwisaka kuna, Yandi tubaka, “Beno tala Israélite yina na yandi luvunu kele ve,” na nzonzolo yankaka, “Muklisto, muntu ya kieleka.”

Yandi tubaka, “Wapi mutindu Nge me zaba munu, Rabbi?”

¹²² Yandi tubaka, “Na ntwala Philippe kubokila nge, ntangu nge vwandaka na nsi ya yinti, Mu monaka nge.”

¹²³ Kento yina vwandaka basika menga. Yandi talaka na zulu ya nkonga ya bantu.

¹²⁴ Bawu banzaka tí bisalu na Yandi vwandaka ya diabulu, mpe bawu tubaka na ntíma na bawu, “Yandi kele Béalzébül.” Mpe Yandi zabaka mabanza ya bawu. Ya kieleka?

¹²⁵ Yandi tubaka, “Mu ke sala kima mosi ve tii kuna Tata ke lakisa Munu ntete. Mpe bisalu yina Mu ke sala, beno mpe ke sala yawu.” Na yina Yandi fwana vwanda, kana Yandi ke sala na kati ya Dibuundu ya Yandi, samu ti ya kele Ndinga ya Yandi.

¹²⁶ Ntangu yayi mu zola kuyufula beno. Kana na kati ya nkonga ya bantu yayi, na kutanga bantu zole to tatu, Mfumu ke sala ti bawu ke vwanda na lukwikilu ya mingi samu na kusimba lele ya Yandi, mpe Yandi ke vutuka na Mpeve ya Yandi mpe ke sala kaka kieleka mutindu Yandi salaka ntangu Yandi vwandaka awa na zulu ya ntoto, beno nionso ke sepela na kundima Yandi mutindu munganga ya beno? Beno ke sala yawu? Beno tuba, “Amen,” kana beno ke sala yawu. [Dibuundu me tuba, “Amen.”—Mu.] Bika ti Yandi kupesa yawu, ya kele kisambu ya munu. Ntangu yayi kana beno ke sambila kaka. Mpe kana beno . . .

¹²⁷ Bambevo yikwa na kati awa zola beluka, beno telemisa maboko ya beno. Bisika nionso, mbote mingi, bambevo yina zola beluka.

¹²⁸ Ntangu yayi, kana ya kele na muntu na kati ya kivinga yayi yina mu . . . Mu zaba muntu ve yina mu ke na kutala.

¹²⁹ Mu banza ti yayi kele Rosella ya kuvwanda awa, mwa mwana ya kento yina vwandaka kinwa-malafu, yina ba bokilaka na lukutakanu kisika mosi kuna, yandi vwandaka kinwa-malafu, mpe badokotolo bikaka yandi. Yandi, ntangu ba bokilaka yandi na Mfumu, mwana-kento zaba ti mu me monaka yandi ata fioti ve to mu me zaba yandi ve. Mpe Mfumu tubaka na yandi nionso samu na luzingu ya yandi mpe mpasi ya yandi, mpe tubaka na yandi ti yandi ke beluka. Mpe yandi yayi awa na nkokila yayi, trophée ya lemvo ya Nzambi. Kinwa-malafu, tii kuna dokotolo na manima ya dokotolo bikaka yandi, ata mpe ba-alcoolique Anonyme. Mu zaba yandi.

130 Kasi, na mutindu yankaka, mu ke ndima ti mpangi-bakala yayi ke tala munu, yina me vwanda awa na lele ya mpembe, yandi kele mpangi-bakala yina ke natilaka beto bafololo. Mu ke kwikila ti ya kele kieleka. Mu—mu ke banza ve na nkumbu ya yandi ntangu yayi. Yandi vwandaka na yinzo ya munu ntama mingi ve, na Mpangi Boze; Schuler, Mpangi Shultz.

131 Na nganda ya yawu, mu banza ti mu me mona Mpangi Fred Sothmann kaka mwa ntangu fioti me luta, kisika mosi kuna na kati ya kivinga, kasi mu me zimbana kisika ya vwandaka ntangu yayi. Na yina, yandi vwandaka, yandi kele awa kisika mosi.

132 Mpe mu—mu zaba ve muntu yankaka. Kasi Nzambi zaba beno nionso. Kana beno sambila mpe beno lombana na Nzambi, kuteza lukwikilu ya beno.

133 Mpe beno kwenda ve na lweka yankaka ntangu yayi. Beno vwanda kieleka na luzitu na mwa bantangu fioti. Ntangu yayi, *Kwikila Kaka*, kana beno me zola. Mpe kaka na luzitu nionso mutindu beno lenda sala samu na mwa ntangu fioti, mpe beno vwanda kaka swi.

134 Beno banza kaka, Klisto silaka yawu. “Na mwa ntangu fioti, mpe yinza ke mona Munu diaka ve; kasi beno ke mona Munu, samu munu. . .” (“Munu,” muntu yankaka ve. *Munu* kele kiyingilu kimuntu.) “. . . Mu ke vwanda na beno tii na nsuka ya yinza. Bima yina mu ke sala, beno mpe, ke sala yawu.” “Yesu Klisto mutindu mosi mazono, bubu yayi, mpe kukonda nsuka.” Ya kieleka? Ya fwana vwanda kieleka.

135 Mbote, mu ke vutula matondo mingi na Mfumu. Mu ke. . . Beno lenda telemisa bayintu ya beno kana beno zola.

136 Kaka awa na nsongi, ya kele na mama yina kele ya kuvwanda awa na nsongi. Ya kele kento ya ndombe. Mama, mu zaba nge ve. Nzambi zaba nge. Kasi ya kele na Nsemo yina na zulu ya kento yango ntangu yayi. Yandi ke. . . Kana Mfumu ke talisa na munu yina kele mpasi ya nge, mpe na yina nge ke na kusambila, nge ke kwikila ti ya kele Mfumu Yesu samu na kusadisa nge? Nge fwana vwanda na kati ya mpasi, to kima yina nge ke zola, samu Yawu yina.

137 Beno me mona, bankundi, beno ke tuba, “Mbote, mu ke na kumona Yawu ve.” Ya lenda salama ti beno ke mona Yawu ve. Mu ke na kutala mbala mosi na Yawu. Beno me mona? Beno ke tuba, “Mbote, Mpangi Branham, kana nge lenda mona Yawu na ba-sense ya nge, mu lenda, mpe.” Oh, ve.

138 Paul monaka Yawu, Yesu na mutindu ya Nsemo, mpe bayina vwandaka na yandi monaka Yawu ve. Beno me mona? Bantu ya mayele monaka Mbwetete, Nsemo yina twadisaka bawu, kasi muntu yankaka ve monaka Yawu. Ya kele kaka samu na bantu fioti. Ya kele makabu.

139 Kento yango kele na mpasi ya sinusite. Ya kele kieleka. Nge kele mpe na mpasi ya ntima. Ya kele kaka kieleka. Beno kuwa, nkumbu ya nge kele, ba ke bokilaka nge “Essie.” Um-hum. Nkumbu ya nge ya nsuka kele Upshire. Um-hum, um-hum. Nge ke zingaka na Nord ya Bala-bala Cleveland. Adresse ya nge kele 1264. Ya kele kaka kieleka. Ya nge . . . Nge me simba Kima mosi, mama. Nge zaba ti nge me simba munu ata fioti ve.

140 Mwana-kento yina me vwanda na ntwala na nge kuna, yandi ke sambila, diaka. Mpe yandi ke sambila samu na muntu yankaka, mpe yina kele mama ya nge, mpe yandi ke na kimbevo na ba-poumon ya yandi. Mpe beno kele na mwa kimpangi na kento yayi *awa*. Beno kele bokilo ya yandi ya kento. Mpe nkumbu ya nge kele Margaret. Ya kele kieleka. Mpe beno ke zingaka kisika mosi. Mu ke mona beno kukwiza, mpe kukota.

141 Yinki nge ke banza samu na yawu, tata, bakala yina ke landa yina me vwanda kuna? Nge ke kwikila ti Yesu Klisto kele Mwana ya Nzambi? Nge ke kwikila? Kana Mfumu lenda monisa na munu yina kele mpasi ya nge, nge ke ndima Yandi? Nge ke na mpasi na estomac. Ya kieleka. Kana ya kieleka, telema. Ya kieleka. Nge kele mulongi.

Kieleka, beno ke tuba, “Yandi ke na kutala bilele ya yandi ya kinganga-Nzambi.”

142 Mbote mingi, na lweka ya yawu, muntu mosi ke vingila ti nge vwanda Presbytérien, kasi beno kele mulongi ya Pentecote. Ya kele kieleka. Amen. Kidi-kidi ya nge kele yina me nata bamputa na kifundu ya nge. Yawu me kwenda. Vutuka na yinzo mpe beluka, mpangi-bakala. Amen.

Beno vwanda na lukwikilu na Nzambi. Beno tula ntembe ve.

143 Yinki nge ke banza, yina kele ya kuvwanda awa? Yinga. Uh-huh. Nge ke kwikila? Nge ke kwikila ti mu kele kisadi ya Nzambi? To, nge zola kima mosi na Nzambi. Kana Nzambi ke talisa na munu yina nge ke zola, nge ke kwikila ya kele ya Kimpeve ke na kusalama? Nge ke kwikila yawu, kaka kieleka yina Yesu ke tuba? [Mpangi-kento me tuba, “Na ntima ya munu ya muvimba.”—Mu.] Na ntima ya nge ya nge ya muvimba. Nge kele na kivimbu, mpe kivimbu yina kele na luketo ya nge. Ya kieleka. Mpe nge kele diaka na mpasi na estomac. Ya me salama samu na kidi-kidi. Ya kieleka. Uh-huh. Nkumbu ya nge kele Eva May. Readman kele nkumbu ya nge ya nsuka. Nge ke zingaka na bala-bala, 1378 West Street 13. Ya kele kieleka.

Ti beno fwana zaba ti mu kele kisadi ya Nzambi, yina kele mwana ya nge ya kento ya fioti yina me vwanda kuna. Nge zola ba sambila samu na yandi. Mwana-kento yina ya fioti kele na hemorrhagie, mpe ya kwisaka na yandi ntangu yandi ke dasukaka to yandi ke banda na kudila ngolo. Ya kele MUTINDU ME TUBA MFUMU.

Mwana-bakala yina ya fioti kele mpangi ya yandi ya bakala. Ya kieleka. Mwana-bakala ya fioti, mpe, nge zola ba sambila samu na yandi. Yandi kele na mpasi ya kivumu, mpe yandi me zimbisa kizitu mingi ntama mingi ve, mpe. Mutindu yina ve? Ya kele **MUTINDU ME TUBA MFUMU**.

¹⁴⁴ Kento yayi ya mundele ya kuvwanda na lweka ya nge, ke monana ti yandi ke na mpasi ya kima mosi. Nge ke kwikila, mpangi-kento? Beno ke kwikila ti Nzambi me fidisa Mwana ya Yandi, Yesu Klisto, samu na kutuba na nsungi ya Bantu ya makanda ti Yandi ke kwisa ntama mingi ve? Nge kele na kimbevo ya glande ke yangisa nge, mpe diaka mpasi ya colonne, nge kele na kidi-kidi. Nge kele ve ya mbanza yayi, mpe. Nge me katuka na Detroit. Numelo ya nge, kisika nge ke zingaka, kele 12134 Fandler Street. Ya kieleka. Detroit, na Michigan. Nge kele Italien. Nkumbu ya nge kele Viola P-o-l-o-m. . . Polomba. Uh-huh. Vwanda na lukwikilu na Nzambi, mpe baka yina nge me lombamba.

¹⁴⁵ Yinki beno ke banza, na lweka yayi? Beno ke kwikila na ntima ya beno ya muvimba?

¹⁴⁶ Yinki samu na nge, mama yina ya fioti me vwanda kuna? Nge ke kwikila na ntima ya nge ya muvimba, mama yina ya fioti kuna na nsuka? Mbote, to mosi ya beno, ke na mfunu ve. Yinki beno ke banza, beno yina kuna, kaka pene-pene ya yandi? Nge ke kwikila na ntima ya nge ya muvimba, mama yayi ya fioti ya kuvwanda, ke tala munu? Yinki nge ke banza samu na yawu? Nge ke kwikila ti Mfumu Yesu lenda belusa nge na varice ya misisa yina nge ke na yawu? Nge ke kwikila? Mbala yankaka nge ke banza yayi, nge ke kwikila diaka kana mu tuba na nge ti bakala ya nge ke na kimbevo ya dikutu. Nge zolaka ti ba sambila samu na yandi. Ya kieleka kaka. Uh-huh. Ntangu yayi nge ke kwikila na munu? Nge vwandaka me bakula yawu ntete ve, na kubanda. Yina kele mutindu ya kuvumbula nge, kima ya yawu, samu nge me kuzwa kubeluka ya nge kuna.

¹⁴⁷ Nge telemisaka diboko ya nge, na ntwala na yandi, mama. Yinki nge ke banza samu na yawu? Nge ke kwikila ti Nzambi ke belusa nge? [Mpangi-kento me tuba, “Mu zaba ti Yandi lenda sala yawu.”—Mu.] Nge ke kwikila? Mbote, na yawu arthrite ya nge ke bika nge. Nge lenda kwikila? Huh?

¹⁴⁸ Yinki nge vwandaka banza, tata, nge yina me ningisa maboko ya nge? Nge ke kwikila ti Nzambi lenda belusa nge na mpasi ya ntima ya nge, kubelusa nge? Nge ke kwikila ti Yandi ke sala yawu?

¹⁴⁹ Nge, yina me vwanda kuna, ke tala yandi, nge ke kwikila, mpe? Nge zola Nzambi. . . Nge vwandaka na mpasi ya ntima, diaka. Mutindu yina ve? Yinga. Mpe nge vwandaka na diabète, mpe. Ya kieleka. Nge ke kwikila ti Nzambi ke belusa nge? Na yina nge lenda kuzwa yawu.

Beno ke kwikila ve? Beno vwanda na lukwikilu na Nzambi!

¹⁵⁰ Yinki kele awa na nsi? Nge, tata, yina me vwanda kuna na nsuka ya kiti, nge ke kwikila? Nge lenda sala yawu. Nge me beluka. Nge vwandaka na mpasi ya makulu, mutindu yina ve? Nge ke kwikila ti Mfumu Yesu. . . Kasi nge ke na kusambila samu na muntu yankaka ntangu yayi, yina kele mpangi ya nge ya bakala, mpe yandi kele na Wisconsin. Ba me sala yandi lipaso na ba-poumon ya yandi. Ba me katula ndambu ya yawu. Ya kieleka. Nge me kwikila? Na yina beno lenda kuzwa yina beno ke lomba.

Oh, nkembo na Nkumbu ya Mfumu!

Mu ke kumisa Yandi, mu ke kumisa Yandi,
Beno kumisa Mwana-dimeme yina kufwaka
samu na bansumuki;
Beno pesa Yandi nkembo beno nyonso bantu,
Samu Menga ya Yandi me sukula matono
nyonso.

¹⁵¹ Mfumu ya kusakumuna, beto ke mona Nge kilumbu mosi kukwiza kuna na Mazulu. Beto zaba ti Nge kele awa ntangu yayi na kati ya Nzutu ya kimpeve, Nge me tuba Nge mosi na beto na mutindu ya kulunga. Yinza lenda tanga yawu ve, Mfumu. Beto ke vingila yawu ve, samu ti Nge tubaka, “Bawu ke mona Munu diaka ve.” Kasi beto zaba ti Nge kele na bana yina lenda mona Nge. Beto kele bana yina zaba Nge. Mpe beto ke vutula matondo samu na yawu.

¹⁵² Mpe beto ke sambila ntangu yayi ti Nge ke kombola na zulu ya yinzo yayi, na Mpeve-Santu ya nene, mpe kubelula konso mbevo na kati awa. Kaka na ntangu yayi baka nkembo samu na Nge mosi, Mfumu. Bika ti bantu kuvwanda ve na mubulu, kasi bika ti bawu telema mpe kusema, mpe—mpe kupesa Nzambi lukumu mpe nkembo. Na Nkumbu ya Yesu.

¹⁵³ Kana beno ke kwikila Yandi, beno telama mpe beno pesa Yandi lukumu na ntima ya beno ya muvimba. Mpe beno sepela na Mfumu Yesu, samu ti Yandi ntangu yayi ke belula mosi na mosi ya beno, samu na nkembo ya Yandi ya nene ya Kinzambi. Mfumu kusakumuna beno. Amen.



BISONO NA ZULU YA KIBAKA KNG58-0108
(The Handwriting On The Wall)

Nsangu yayi ya Mpangi William Marrion Branham, kulongamaka na Kingelesi, na Kilumbu ya tatu na nkokila, na kilumbu ya 8 ya Ngonda ya ntete, na mvula 1958, na Lane Tech High School na Chicago, Illinois, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org